



Am Morge am 6i het unsere Tag agfange, mit 2 Autos hämer uns ufe Weg gmacht und sin no vor der Türöffnig, in dr iskalte Dunkelheit in Laufeburg acho. D'Gymnastik vo de Mädels het zwar erscht am Nomittag stattfunde, aber will d'Jasmina im Einzel und au zu Zweit mit dr Flavia am frühe Morge scho hän müesse starte, sin dr Rescht vo dä Mädels zur mentale Unterstützig au scho am Morge mitcho.

Total fit und usgeschlofe hän sich d'Jasmina und d'Fiavia uf ihri Vorfürige vorbereitet, d'Musik wird in dr Garderobe mehrmols glost, d'Kür wird im Kopf nomol duregmacht. Iwärme, alege, schminke und den gohts au scho los. D'Jasmina eröffnet dr allerershti Block am Morge mit ihrer Kür ohne Handgrät. Trotz ihrer Rückeverletzung het sie e souveräni Leischtig zeigt. Au hämer uns dörfe drei Minute lang verwöhne lo vo dr Jasmina ihrer Ball Vorfürig. D' Note vo 9.62 isch mehr als verdient. Im Gymnastik zu zweit ohni Handgrät hän sich d'Fiavia und d'Jasmina stolz e Brozemedaille dörfe go abhole. Au ihri Gymnastik mit em Ball hän die zwei ohni Ballverlust guet gmeischeret. Nacheme turnerische Morge hämer uns denn, nachdäm mir uns mitteme Mittagässe gstärkt hän, langsam vorbereitet uf dr Gruppewettkampf am Nomittag. Es isch puderet und zöpflert worde. D'Nervosität, s'neue Programm s'erscht mol vorzführe, isch als wie mehr gschtiege.

Mit gmischte Gefühl, zwüsche Ungwüssheit und Vorfreud, hänn sie ihri Usgangsposition uf em Wettkampflplatz ignoh.

E grossartigi Darbietig mit vill Power, Engagement, Usdruck und Präzision hän unseri Gym-Mädels zeigt. S'Publikum het mitgfieberet und d'Stimmig in der Halle währender Üebig isch eifach dr Wahnsinn gsi. Miteme super freudige Gefühl sin si vom Platz grennt, sich in d Arme gfalle und hän gseit miteme grinse " es isch so geil gsi". Mir wän grad nomol uf d Bühni. Mit dr grandiose Note vo 9.49 und em wohlverdiente 2. Platz werde si wohl das Gefühl no witer trage.